

全宋詞



宋詞

四

中華書局

# 張潞

潞字東之，永新人。牧昭州。有張昭州集，今不傳。

祝英臺近 木樨

寶熏濃，雲幄重，瓊葉麗金蕊。黛綠蜂黃，秋態未  
憔悴。繡簾深院黃昏，著香無處，人欲睡、爲花重  
起。月如水。別有天外樓臺，玲瓏異塵世。翠袖  
生寒，祇欠素娥倚。何如倩取西風，吹將歸去，爲  
添在、廣寒宮裏。陽春白雪卷八

# 崔與之

與之字正子，廣州人。生於紹興二十八年（二五）。  
紹熙四年（二九）進士。累官祕書監、權工部侍郎，  
出知成都府，進本路安撫使。又爲廣東路經略安  
撫使、兼知廣州，拜參知政事、右丞相，皆力辭，以  
觀文殿大學士致仕，封南海郡公。嘉熙三年（三三）  
卒，年八十二，謚清獻。有詩文集。

## 水調歌頭 題劍閣

萬里雲間戍，立馬劍門關。亂山極目無際，直北是  
長安。人苦百年塗炭，鬼哭三邊鋒鏑，天道久應還。  
手寫留屯奏，炯炯寸心丹。對青燈，搔白髮，漏  
聲殘。老來勳業未就，妨却一身閒。梅嶺綠陰青  
子，蒲澗清泉白石，怪我舊盟寒。烽火平安夜，歸  
夢到家山。

## 賀新郎 壽轉運使趙公汝燧

雨過雲容掃。使星明、福星高照，福星旁照。槐屋  
猶暄梅正熟，最是清和景好。望金節、雲間縹緲。  
和氣如春清似水，漾恩波、沾渥天南道。晨鵲噪，  
有佳報。天家黃紙除書到。便歸來、升華天下，  
安邊養浩。好是六逢初度日，碧落笙歌會早。遍西  
郡、歡聲多少。人道菊坡新醞美，把一觴、滿酌歌  
難老。瓜樣大，安期棗。以上二首見崔清獻公集卷五

# 吳玘

玘字居父，號雲壑，汴（今河南省開封）人。宋高宗  
 吳皇后之姪。乾道九年（一一三三），特授添差臨安府  
 通判，歷尚書郎，除知明州，兼沿海制置使，尋知鄞  
 州，再知慶元。慶元二年，以鎮安節度使留守建康，  
 嘉泰二年（一一三二）遷少保。卒諡忠惠。有雲壑集。

念奴嬌 題浮玉石簷山

我來浮玉，似憑陵滄海，躡金鰲背。又若騎鯨遊汗  
 漫，飛入八荒之外。鐘鼓傳聲，樓臺倒影，不類人  
 間世。徘徊吟眺，恨無陶謝酬對。今古潮落潮  
 生，問英雄多少，與江俱逝。直欲乘風歸閩苑，疑  
 是三生習氣。未辨魚簑，先盟鷗鷺，奈卜鄰無地。  
 從今清夜，夢魂應繞空翠。嘉定鎮江志卷二十一

柳梢青 元月立春

綵仗鞭春。鵝毛飛管，斗柄回寅。拂面東風，雖然  
 料峭，畢竟寒輕。戴花折柳心情。怎捱得、元宵

放燈。不是今朝，有些殘雪，先去踏青。陽春白雪卷二

## 浪淘沙

雲葉弄輕陰。屋角鳩鳴。青梅著子欲生仁。冷落  
 江天寒食雨，花事關情。池館畫盈盈。人醉寒輕。  
 一川芳草只銷凝。時有入簾新燕子，明日清明。

又

岸柳可藏鴉。路轉溪斜。忘機鷗鷺立汀沙。咫尺  
 鍾山迷望眼，一半雲遮。臨水整烏紗。兩鬢蒼  
 華。故鄉心事在天涯。幾日不來春便老，開盡桃  
 花。以上二首見陽春白雪卷四

## 水龍吟

紫皇高宴蕭臺，雙成戲擊瓊包碎。何人爲把，銀河  
 水翦，甲兵都洗。玉樣乾坤，八荒同色，了無塵翳。  
 喜冰銷太液，暖融鳩鵲，端門曉、班初退。聖主  
 憂民深意。轉鴻鈞、滿天和氣。太平有象，三宮二  
 聖，萬年千歲。雙玉杯深，五雲樓迴，不妨頻醉。細

看來，不是飛花，片片是、豐年瑞。

醉江月

玉虹遙挂，望青山隱隱，一眉如抹。忽覺天風吹海立，好似春霆初發。白馬凌空，瓊轡駕水，日夜朝天闕。飛龍舞鳳，鬱蔥環拱吳越。此景天下應

無，東南形勝，偉觀真奇絕。好是吳兒飛綵幟，蹴起一江秋雪。黃屋天臨，水犀雲擁，看擊中流楫。晚來波靜，海門飛上明月。以上二首見武林舊事卷七

存目詞

歷代詩餘卷五有吳琚點絳脣「顛領天涯」一首，乃趙彥端所作，見介庵趙寶文雅詞卷四。

劉翰

翰字武子，長沙人。吳琚之客。有小山集一卷。

桂殿秋 壽于湖先生

青帝子，碧蓮宮。不駕雲車騎白龍。瑤池路遠羽

衣溼，玉珮冷冷明月中。

又 同上

雙玉節，到神京。碧杯仙露冷如冰。一聲金磬千花發，洞口天風吹酒醒。以上二首見小山集

蝶戀花

團扇題詩春又晚。小夢驚殘，碧草池塘滿。一曲銀鉤簾半捲。綠窗睡足鶯聲軟。瘦損衣圍羅帶減。前度風流，陡覺心情懶。誰品新腔拈翠管。畫樓吹徹江南怨。陽春白雪卷二

清平樂

萋萋芳草。怨得王孫老。瘦損腰圍羅帶小。長是錦書來少。玉簫吹落梅花。曉寒猶透輕紗。驚起半屏幽夢，小窗淡月啼鴉。

案此首歷代詩餘卷十三誤作潘昉詞。

又

鴛鴦翡翠。小小池塘水。落絮遊絲花滿地。度日



闌干獨倚。金刀裁就春衫。起來初試輕寒。滿把相思清恨，題詩欲寄江南。以上二首見陽春白雪卷三

好事近

花底一聲鶯，花上半鉤斜月。月落烏啼何處，點飛英如雪。東風吹盡去年愁，解放丁香結。驚動

小亭紅雨，舞雙雙金蝶。陽春白雪卷四

菩薩蠻

去時滿地花陰月。歸來落盡梧桐葉。簾外小梅殘。

綠窗幽夢寒。明朝提玉勒。又作江南客。芳草

徧長亭。東風吹恨生。陽春白雪卷七

以上劉翰詞七首用周泳先輯小山詞。

趙靡

靡字浦夫，號竹潭，開禧間爲處州太守。

謁金門

天色晚。雲外一筇斜雁。獨凭闌千秋滿眼。菊花

寒尚淺。葉落香溝紅泛。懶把新詩題怨。何處笛聲三弄斷。月遲簾未卷。陽春白雪卷五

杜旗

旗字伯高，號橋齋，金華人。嘗登呂祖謙之門。淳熙，開禧間兩以制科薦。有橋齋集，不傳。兄弟五人，時稱金華五高。

醉江月 石頭城

江山如此，是天開萬古，東南王氣。一自髯孫橫短策，坐使英雄鵠起。玉樹聲消，金蓮影散，多少傷心事。千年遼鶴，併疑城郭非是。當日萬駟雲屯，潮生潮落處，石頭孤峙。人笑褚淵今齒冷，只有袁公不死。斜日荒煙，神州何在，欲墮新亭淚。元龍老矣，世間何限餘子。

摸魚兒 湖上

放扁舟、萬山環處，平鋪碧浪千頃。仙人憐我征塵

久，借與夢游清枕。風乍靜。望兩岸羣峯，倒浸玻璃影。樓臺相映。更日薄煙輕，荷花似醉，飛鳥墮寒鏡。中都內，羅綺千街萬井。天教此地幽勝。仇池仙伯今何在，隄柳幾眠還醒。君試問。□原無空格據律補此意，只今更有何人領。功名未竟。待學取鴟夷，仍攜西子，來動五湖興。

驀山溪 春

春風如客，可是繁華主。紅紫未全開，早綠遍、江南千樹。一番新火，多少倦游人，纖腰柳，不知愁，猶作風前舞。小闌干外，兩兩幽禽語。問我不歸家，有佳人、天寒日暮。老來心事，唯只有春知，江頭路，帶春來，更帶春歸去。以上三首見詞品卷六

存目詞

歷代詩餘卷六十八有杜夔念奴嬌「小妝朱檻」一首，乃王炎作，見雙溪詩餘。

劉仙倫

仙倫一名擬，字叔擬，號招山，廬陵（今江西吉安）人。有招山小集一卷。

賀新郎

翠蓋籠嬌面。記當年、沈香亭北，醉中曾見。見了風流傾國豔，紅紫紛紛過眼。算好處、何嫌春晚。誰把天香和曉露，倩東君、特地勻嬌臉。千萬朵，開時遍。隔花聽取提壺勸。道此花過了，春歸蝶愁鶯怨。挽住東君須醉倒，花底不妨留戀。待喚取、笙歌一片。最愛就中紅一朵，似狀元、得意春風殿。還惹起，少年恨。全芳備祖前集卷二牡丹門

木蘭花慢 秋日海棠

漸秋空向晚，被風雨、攪重陽。正木落疏林，海棠枝上，忽見紅妝。料應妬他蘭菊，任年年、獨甚占秋光。故把春風嬌面，向人逞豔呈芳。看來畢竟

此花強。祇是欠些香。詎一似當年，五陵公子，卻厭膏粱。肯來水邊竹下，與幽人、相對說淒涼。只恐夜深花睡，五更微有清霜。

菩薩蠻

東風去了秦樓畔。一川煙草無人管。芳樹雨初晴。黃鸝三兩聲。海棠花已謝。春事無多也。只有牡丹時。知他歸不歸。以上二首見全芳備祖前集七海棠門

賀新郎 壽王侍郎簡卿

某茲者共審某官道協降神，祥開誕旦。五百年而名世，允謂間生；八千歲而爲春，定膺難老。俯仰都無於愧怍，訪讒何損於忠良。卻雁鷺而暫得閒身，對龜鶴而永綏眉壽。輒陳俚語，上祝台躔。狂斐是慚，覽擲爲幸。

小隊停鉦鼓。向沙邊、柳下維舟，慶公初度。平盡羣蠻方易鎮，此事多應有數。奈自古、功成人妬。君看樂羊中山役，任謗書、盈篋終無據。千載下，竟誰與。詩中帶得西山雨。指天台、雁蕩歸歎，

壽鄉深處。緩急朝廷須公出，更作中流砥柱。笑癡騃、紛紛兒女。多少人間不平事，有皇天、老眼能區處。揮玉壘，聽金縷。

案此首又見截江網卷四，調名作「乳燕曲」，題作「壽王帥」，載有小序，茲據補。

又 題吳江

重喚松江渡。嘆垂虹亭下，銷磨幾番今古。依舊四橋風景在，爲問坡仙甚處。但遺愛、沙邊鷗鷺。天水相連蒼茫外，更碧雲、去盡山無數。潮正落，日還暮。十年到此長凝竚。恨無人、與共秋風，鱸絲幕縷。小轉朱絃彈九奏，擬致湘妃伴侶。俄皓月、飛來煙渚。恍若乘槎河漢上，怕客星、犯斗蛟龍怒。歌欸乃，過江去。

又 贈建康鄭玉脫籍

鄭玉非娼女。嘆塵緣未了，飄零被春留住。腸斷胭脂坡下路。成甚心情意緒。生怕入、梨園歌舞。寂



襄陽臺雲雨散，算人間、誰是吹簫侶。空買斷，兩眉聚。新來鏡裏驚如許。暗傷懷、鶯老花殘，幾番春暮。事逐孤鴻都已往，月落千山杜宇。念脩竹、天寒何處。不念瑣窗並繡戶，妾從前、命薄甘荆布。誰爲作，解條主。

念奴嬌

送張明之赴京西幕

餘艖東下，望西江千里，蒼茫煙水。試問襄州何處是，雉堞連雲天際。叔子殘碑，臥龍陳迹，遺恨斜陽裏。後來人物，如君瓌偉能幾。其肯爲我來耶，河陽下士，正自強人意。勿謂時平無事也，便以言兵爲諱。眼底山河，樓頭鼓角，都是英雄淚。功名機會，要須閒暇先備。

又 感懷呈洪守

吳山青處，恨長安路斷，黃塵如霧。荆楚西來行壘遠，北過淮堧嚴扈。九塞貔貅，三關虎豹，空作陪京固。天高難叫，若爲得訴忠語。追念江左英

雄，中興事業，枉被姦臣誤。不見翠華移蹕處，枉負吾皇神武。擊楫憑誰，問籌無計，何日寬憂顧。倚筇長嘆，滿懷清淚如雨。

又 長沙趙帥席上作

西風何事，爲行人掃蕩，煩惱如洗。垂漲蒸瀾都卷盡，一片瀟湘清泚。酒病驚秋，詩愁入鬢，對景人千里。楚宮故事，一時分付流水。江上買取扁舟，排雲湧浪，直過金沙尾。歸去江南丘壑處，不用來尋月姊。風露杯深，芙蓉裳冷，笑傲煙霞裏。草廬如舊，臥龍知爲誰起。

滿江紅

題快閣和徐宰韻

快閣東西，鷗邊問、晚晴可喜。鷗解語、既盟之後，兩翁曾倚。笛弄慣聽黃魯直，履聲深識徐淵子。添我來、相對兩忘機，真相似。也不種，閒桃李。也。不翫，佳山水。有新詩字字，愛民而已。一片心閒秋水外，三年人在春風裏。漲一篙、江水送歸鴻，

明朝是。

又春晚

著意留春，留不住，春歸難戀。最苦是、梅天煙雨，  
麥秋庭院。嫩竹陰濃鶯出谷，柔桑采盡蠶成繭。奈  
沈腰、寬盡有誰知，難消遣。幽閣恨，雙眉斂。香  
牋寄，飛鴻遠。向風簾羞見，一雙歸燕。翠被閒將  
情做夢，青樓賺得恩成怨。對尊前、莫惜喚瓊姬，  
持杯勸。

霜天曉角 題蛾眉亭

倚空絕壁。直下江千尺。天際兩蛾凝黛，愁與恨、  
幾時極。暮潮風正急。酒醒聞塞笛。試問謫仙  
何處，青山外、遠煙碧。

案此首陽春白雲卷三作韓元吉詞。

訴衷情 客中

征衣薄薄不禁風。長日雨絲中。又是一年春事，花  
信到梧桐。雲漠漠，水溶溶。去匆匆。客懷今

夜，家在江西，身在江東。

江神子

洪守出歌姬就席口占

華堂深處出娉婷。語聲輕。笑聲清。燕語鶯啼，一  
一付春情。恰似洛陽花正發，見花好，不知名。  
金甌盛酒玉纖擎。滿盈盈。勸深深。不怕主人，教  
你十分斟。只怕酒闌歌罷後，人不見，暮山青。

繫裙腰 愁別

山兒蘆蘆水兒清。船兒似葉兒輕。風兒更沒人情。  
月兒明。廝合造、送人行。花庵誤作「行人」，從粹編乙。眼  
兒蕪蕪淚兒傾。燈兒更冷清。遭逢著雁兒，又沒  
前程。一聲聲。怎生得、夢兒成。

永遇樂 春暮有懷

青幄蔽林，白氈鋪徑，紅雨迷楚。晝閣關愁，風簾  
捲恨，盡日縈情緒。陽臺雲去，文園人病，寂寞翠  
尊彫俎。惜韶容、忽忽易失，芳叢對眼如霧。巾  
敲潤裊，衣寬涼滲，又覺漸回驕暑。解籜吹香，遺

丸薦脆，小芰浮鴛浦。畫欄如舊，依稀猶記，佇立  
一鉤蓮步。黯銷魂，那堪又聽，杜鵑更苦。

菩薩蠻

怨別

吹簫人去行雲杳。香篝翠被都閒了。疊損縷金衣。  
是他渾不知。冷煙寒食夜。淡月梨花下。猶自  
軟心腸。爲他燒夜香。

以上十四首見中興以來絕妙詞選

卷五

江神子

東風吹夢落巫山。整雲鬢。卻霜紈。雪貌冰膚，曾  
共控雙鸞。吹罷玉簫香霧溼，殘月墜，亂峯寒。  
解璫回首憶前歡。見無緣。恨無端。憔悴蕭郎，贏得帶圍寬。  
紅葉不傳天上信，空流水，到人間。

蝶戀花

小立東風誰共語。碧盡行雲，依約蘭皋暮。誰問  
離懷知幾許。一溪流水和煙雨。媚蕩楊花無著  
處。纔伴春來，忙底隨春去。只恐遊蜂黏得住。斜

陽芳草江頭路。

一剪梅

唱到陽關第四聲。香帶輕分。羅帶輕分。杏花時  
節雨紛紛。山繞孤村。水繞孤村。更沒心情共  
酒尊。春衫香滿，空有啼痕。一般離思兩銷魂。馬  
上黃昏。樓上黃昏。

以上三首見絕妙好詞卷二

沁園春

慶彭司戶

聞道參軍，今日垂弧，勝如去年。正新頒藍綬，天  
香芬馥，初開黃牒，御墨新鮮。鼻祖登科，已踰百  
載，衣鉢于今喜再傳。圖南事，看搏風九萬，擊水  
三千。官曹小試民編。有奕世甘棠在道邊。向  
樽前有興，細斟清醪，琴中得趣，緩拂朱絃。東觀  
酬書，西垣草制，此去掀騰好看鞭。應難老，信君  
家眉壽，自有錢山。

好事近

慶祝司理

春事恰平分，南極夜來星瑞。聞道都曹初度，擁萬

紅千翠。長才傑出應時須，一郡賴綱紀。看即  
詔還入覲，上駕行班裏。

沁園春 壽共大卿恕齋治易

周易一書，更三聖人，深切著明。凡變通動靜，有  
形有象，盈虛消息，時止時行。天相名卿，日探妙  
趣，往古來今無兩心。褰帷暇，手草編不置，聊以  
娛情。如今祝壽殷勤。請得以推評理致新。看

九重有命，晉侯錫馬，三公論道，鼎足承君。同厥  
震男，拔乎泰茹，玉筍班中聯步什疑誤。賢奮建，定  
豐亨豫大，揚夫王庭。以上三首見截江網卷五

喜遷鶯 壽令人

祥雲籠畫。正梅花弄粉，歲寒時候。長記今朝，瑤  
臺仙子，降作人間明秀。四德生來全備，綠鬢年年  
依舊。更滿目，兒婦兒孫，森羅前後。知否。笙

歌奏。去歲芳筵，好事今年又。壽燭高燒，壽詞齊  
唱，滿勸長生酒。元自榮華富貴，況復康寧福壽。

願此去，等鶴算龜齡，天長地久。截江網卷六

鷓鴣天

簾幕祥風動玉鉤。鳳簫聲徹瑞煙浮。蕭郎玉女來  
相會，今日齊眉醉玉樓。同富貴，共風流。一封  
花誥一封侯。更須有子腰金斗，鏡裏雙鸞到白頭。  
翰墨大全乙集卷十七

滿江紅 壽郡幕

過了燒燈，楊柳外、無邊春色。慶初度、香浮東閣，  
瑞呈南極。翰墨場中推老手，曾魁多士催勅敵。到  
而今、官簿在天台，神仙籍。和月倚，南坡石。滴  
露點，牀頭易。看白頭紅頰，目光搖碧。富貴康強  
仍有子，人生似此應難得。更摩挲、銅狄說當年，  
真消息。翰墨大全丙集卷十三，又見丁集卷二，無撰人姓名，題  
作壽張食。

好事近 二月十八日

桃李綠陰濃，屈指中和三六。恰是仙翁初度，靄瑞

煙芬馥。歌喉宛轉遶華堂，總是長生曲。他日  
臨清亭上，看兒孫朝服。

滿江紅 壽留守正 月初三

鳳曆更端，纔信宿、年華方好。深院宇、祥風飄蕩，  
瑞煙繚繞。聞道君侯當誕日，歡聲解壓春寒峭。更  
九衢、煙火近元宵，聞嬉笑。人正在，蓬萊島。燒  
絳蠟，樹清醪。聽清歌豔曲，一聲雲杪。奠枕江淮  
無一事，留都宮殿千門曉。看賜環、千歲侍君王，  
人難老。

念奴嬌 壽尙倅 三月初一

一番春事，到薊林、更兩日重三節。百品名花饒笑  
處，喜遇誕彌佳月。巢葉靈龜，舞琴野鶴，總是千  
年物。來爲公壽，綸巾長映華髮。平生聖處工  
夫，道□深味，胸次眞冰雪。高蹈丘園還謝了，枚  
叟蒲輪朝謁。時上籃輿，相隨孫子，慶滿牀簪笏。  
南豐道價，敬持一瓣香爇。以上三首見翰墨大全丁集卷二

滿江紅 壽胡漕 六月初一

夜半天風，吹佩玉、列仙初度。又恰是、人間六月，  
葉萸方吐。黃紙除書驚乍到，青氈舊物欣重覩。擁  
皇華、玉節待清秋，江南去。招壯士，增王旅。漕  
廩粟，資淮浦。濟江南嘉績，久聞當宁。明弼堂前  
山滿眼，來鴻庭後花無數。看召環、卽到壽星邊，  
朝明主。翰墨大全丁集卷三

醉蓬萊 壽七十一 九月十八

昨長庚入夢，昴宿呈祥，岳神鍾秀。降產英賢，信  
道由天祐。萸莢飛三，九秋將暮，遇稱觴時候。香  
熱沈檀，曲調金縷，滿斟春酒。試紀絳年，六身  
二首，甲子方延，纔經八九。款醉蓬萊，壽與天長  
久。桂子青春，蘭孫方茂，諒箕裘方紹。折桂來秋，  
成名指日，家甍復舊。翰墨大全丁集卷四

以上劉仙倫詞三十一首，用趙萬里輯招山樂章。



存目詞

調名首句出處附注

折丹桂 初秋兩兩 花草粹編卷六 無名氏作，見翰墨大

留萸萸 全丁集卷三

天香 漠漠江皋 詞譜卷二十四 劉鎮(方叔)作，見類

編草堂詩餘卷三

臨江仙 薄紫飄紅 金繩武本草

芳信斷 粹編卷十三 劉鎮(叔安)詞，見中

興以來絕妙詞選卷八

杜旆

旆字仲高，金華人，杜旆之弟。

滿江紅

半落半開花有恨，一晴一雨春無力。……別纜解

時風度緊，離觴盡處花飛急。龍川文集卷十九

韓彥古

彥古字子師，延安人。韓世忠之幼子。隆興二年

(二二四)，將作監丞。乾道二年(二二六)，知嚴州，與

宮觀。三年(二二七)，知秦州，未赴罷。六年(二二七)，

考功員外郎兼權大理少卿。七年(二二七)，權知臨

安府。八年(二二七)，右司員外郎兼權刑部侍郎，除

祕閣修撰知台州。淳熙二年(二二七)，敷文閣待制

知平江府，落職放罷。四年(二二七)，戶部侍郎。五

年(二二七)，戶部尚書，送臨江軍居住。七年(二二八)，

與在外宮觀。九年(二二八)，新差知隆興府再任宮

觀。紹熙三年(二二九)卒。

浣溪沙

一縷金香永夜清。殘編未掩古琴橫。繡衾寒擁寶

缸明。坐聽竹風敲石磴，旋傾花水漱春醒。落梅

和雨打簾聲。陽春白雪卷三

張祥

祥，淳熙十三年(二二六)合州守。

水調歌頭

為愛龍山勝，小隊一登臨。馮仙洞府安在，抉石試

幽尋。商略生平事業，擺脫人間塵土，欲與斷絲茶。  
泉響似相答，未可啓歸心。 中原地，禾黍茂，犬  
羊腥。 君王夢想豪傑，有待掃妖氛。 縛虎正須人  
手，跨鶴緩酬夙志，行矣勿因循。 夜半遣雷雨，助  
我作秋成。 合川縣志卷三十六合川龍多山石刻

## 張履信

履信字思順，號游初，鄱陽（今江西省）人。淳熙中，  
嘗監江口鎮，後通判潭州，官至連江守。

### 柳梢青

雨歇桃繁，風微柳靜，日淡湖灣。 寒食清明，雖然  
過了，未覺春閒。 行雲掩映春山。 真水墨、山陰  
道間。 燕語侵愁，花飛撩恨，人在江南。

### 謁金門

春睡起。 小閣明窗兒底。 簾外雨聲花積水。 薄寒  
猶在裏。 欲起還慵未起。 好是孤眠滋味。 一曲

廣陵應忘記。 起來調綠綺。 以上二首見絕妙好詞卷一

## 趙昂

昂，孝宗時御前應對。

### 婆羅門引

暮霞照水，水邊無數木芙蓉。 曉來露溼輕紅。 十里  
錦絲步障，日轉影重重。 向楚天空迴，人立西風。

夕陽道中。 嘆秋色、與愁濃。 寂寞三千粉黛，臨  
鑑妝慵。 施朱太赤，空惆悵、教妾若爲容。 花易老、  
煙水無窮。 藏一話腴甲集卷一

## 徐玘

玘字公飾，乾道或以前人。

### 謁金門

題沅州幽蘭鋪壁  
秋欲暮。 路入亂山深處。 撲面西風吹霧雨。 驛亭  
欣暫駐。 可惜國香風度。 空谷寂寥誰顧。 已作

竹枝傳楚女。客愁推不去。

又

春欲半。重到寂寥山館。修竹連山青不斷。誰家門可款。紅暈花梢未半。綠醺柳芽猶短。金縷香消春不管。素蟾光又滿。以上二首見雲谷雜記卷三

### 郭應祥

應祥字承禧，號遜齋，臨江軍（今江西省清江）人。生於紹興二十八年（二五）。淳熙八年（二八）進士。嘗官楚越間。有笑笑詞一卷。

萬年歡 瑞慶節

佳氣葱葱，望長安日下，鸞鶴翔舞。天祐皇家，當年挺生真主。令節標名瑞慶，曾未數、電樞虹渚。人都道，福若高宗，太平賽過仁祖。需雲燕錫廣宇。有霓旌絳節，西極金母。笑捧蟠桃，更酌九霞清醕。持向兩宮三殿，願歲歲、此觴同舉。南山壽、

海算沙量，定應高出前古。

菩薩蠻 喜雪

當年瑞雪多盈尺。今年僅有些兒白。天欲兆豐年。須教趁臘前。南枝初破萼。風味渾如昨。快與瀉銀瓶。寒醅醉易醒。

又 施尉生日

開禧三月初逢九。持杯來慶梅仙壽。警捕恰三年。四封人宴然。政成應不日。去作朝京客。陰德合長生。休看三住銘。三住銘，施肩吾作。予近得御書墨本，尉來借錄，云欲依此修行。

又 立春日

雪銷未久寒猶力。霜華特地催晴色。殘臘尙餘旬。隔年先見春。獨憐霜點鬢。羞戴銀幡勝。百里卻熙然。今年強去年。

又 同僚友泛舟作

泉江三遇昌陽節。棹歌還向中流發。急槳更輕橈。

看誰奪得標。明年歸紫淦。尙憶舟同泛。應有  
舊雙鬢。能謳菩薩蠻。

又 六月十三日，同官攜具，以予被薦

轉頭又是清秋近。晚風浙浙涼猶嫩。多謝客攜觴。  
空慙畫餅章。中亭明月可。未要親燈火。十閱  
望舒圓。歸期在眼前。

又 丁卯壽李嗣宗

去年持酒爲君壽。勸君快上懸車奏。通籍已金闈。  
腰銀袍亦緋。壺中閒日月。自有長生訣。父子  
弟兄賢。一門行地仙。

又 去歲壽李嗣立

誕辰遲似秋三日。草堂已有新涼入。鬢綠未全霜。  
欣然把一觴。吟松新納祿。共享清閒福。兩箇  
老人星。君家難弟兄。

又

牡丹已過醮醮謝。那堪風雨連朝夜。底事最堪悲。

春歸人未歸。春宜留取住。人卻推將去。早晚  
遂江濱。歡然誇尹新。

又 丁卯八月九日鵬飛集作

秋堂積雨新涼入。今宵雅趁鵬飛集。勁翮會高風。  
功名歛唾中。筆頭元有準。快寫平生蘊。何日  
捷書來。重陽把一杯。

又 三月六日靜勝小集

去年今日游稽古。爛斑曾著萊衣舞。四世共團爨。  
津然一笑歡。歸期今不遠。孳累俱先遣。猶有  
社中人。相從寂寞濱。

又 錢太夫人之南豐

修途六月清無暑。潘輿穩向盱南去。喜氣已津津。  
平反一笑春。人言陰德報。羅紙重重誥。明歲  
早歸來。泉江去鷁催。

又 鄒伯源園木屋，次彭字先韻

塗黃仙子嬌無力。秋花不敢爭顏色。風物一番新。